

安
徽
金
石
畧

安徽金石畧

卷六

涇縣趙紹祖琴士輯

廬州府

吳金牛山塔鐫字

赤烏二年

在廬江

佚

金牛嶺在廬江縣西北三十里絕頂有塔鐫云吳

赤烏二年造舊有金牛裂土而出故名山

天下名勝志

山在縣西北四十五里山頂有塔造於吳赤烏二

年圯於康熙三十六年

廬江縣志

魏何晏墓甄銘

無年月

在廬江

佚

何晏墳在廬江縣北十七里其基高大景雲二年

有人發墳得甄銘知是何公之墓

太平寰宇記

隋紫微觀碑

開皇十四年

劉穎撰

在巢縣

佚

隋開皇十四年劉穎製銘云廬州襄安縣紫微觀
晉咸康四年會稽道士王妙才之所創也其碑皴

剝難讀

輿地紀勝碑目

隋劉穎製銘開皇十四年立銘石尚存秉鳧馭鶴
吹笙脫履而歸舉手長別十數字餘皴剝不可識
天下名勝志

按晉太元中廢居巢縣僑置蕲縣隋開皇初更
名襄安縣唐武德三年置巢州七年州廢更縣名

爲巢縣屬廬州

趙紹祖識

唐永濟龍王廟碑

無年月

在合肥

佚

碑畧云貞觀間慧滿禪師在山誦蓮花經二十餘年忽有白衣造門曰我東海龍王小子聞師誦經故來聽受其時苦旱爲說法已求其降雨答曰水旱上帝司之若盜布天澤當死僧曰汝捨此身救我此民我誦此經救汝此身諾諾而去須臾膏雨三日龍死師收葬之民爲立祠建碑其後水旱祈之必驗

天下名勝志

龍生前降雨而得罪死龍死後水旱祈之而必

驗其理不能貫串此釋氏張大之言耳

趙紹祖識

唐舍利塔記

無年月

在合肥

存

按合肥北鄉柘塘集西北香社寺殿東南有碑半
段碑額題佛骨舍利塔記六大字首一行云廬州
慎縣城節鎮香社寺佛骨舍利塔碑記署銜西朝
散郎字餘俱浸滅書法似李北海不知何人手筆
廬州府志

按慎縣漢遼遼縣也劉宋置慎縣宋紹興三十
二年改名梁縣明始省入合肥

趙紹祖識

唐奉勅置使者靈廟碑

開元二十年

李泚撰

在

李泚撰開元二十年正月二十五日立於廬州刻
寶類編

唐廬州刺史羅珣德政碑

貞元十九年
在合肥 佚

楊憑撰

刺史羅珣德政碑楊憑撰正書并篆額貞元十九
年四月六日建 廬州府志

按羅珣唐書有傳云越州會稽人萬姓統譜云
廬州人爲本州刺史不知何據 趙紹祖識

唐紫微洞題刻

貞元二十一年 在巢縣 未見

紫微洞有唐人題刻在巢縣洞內有唐人杜子春
等七人正元二十一年磨崖阮戶部有詩云一溪

流水過雙池池外三峯雲四垂行到唐人題字處
紫微巖下立名時常取水以淪茶有詩云紫翠山
圍小洞天洞中石下有寒泉他年誰補茶經闕合
在唐王谷水前

輿地紀勝碑目

宋避仁宗諱改貞爲正故碑目云正元二十一年也碑目此條載在無爲軍內當王象之作碑目時巢縣屬無爲軍也

趙紹祖識

唐崔相國德政碑

大歷二年

李華撰
文載廬州府志

在合肥

明清紹興壬申從外舅帥合肥郡治前有四豐碑屹然有樓基在焉上云唐崔相國德政碑李華文

張從申書天寶中所立也詞翰俱妙念欲摹打是
時大兵後工匠皆逃未歸已而明清持牧貢造朝
私念復來必須償此志繼而外舅易鎮京口後十
年明清赴壽春幕道出於彼始再往訪之則不復
存詢之則云前歲武帥郭振者取以砌城矣大以
悵然悍卒無知亦何足責付之一歎

揮塵餘話

按文有云帝曰爾圓實協朕志則所謂崔相國
者崔圓也集古錄無此碑跋而新書圓傳實照
此文纂輯廬州府志不載所立年月攷金石錄
目第一千四百四載此碑云李華撰張從申正

書大歷二年正月崔圓以大歷三年薨此立於
生前故不言謚而曰相國也王明清謂爲天寶
時立當是從後記憶而誤郭振者廬志謂爲涇
縣人且盛推其築城之功而涇志不載邑郭姓
讀書者少無可問當求其族譜攷之

趙紹祖識

唐梁公德政碑

大歷四年

崔錡撰

在合肥

佚

集古錄云崔錡撰韋玩書薛益篆額碑以大歷四
年立

輿地紀勝碑口

唐合肥城記

代宗時路應求刺廬州始甃合肥城韓昌黎爲作

碑記 天下名勝志

按昌黎文公全集並無合肥城記惟路公神道碑中有云改刺廬州又斃其城民不歲苦等語名勝志言之不詳而廬州府志不知遂以爲合肥城記而誤引之也神道碑云公諱應字從衆冀公之嫡子新唐書路嗣恭傳亦云嗣恭二子應恕並無名應求之說不知名勝志何以言名應求而廬志仍其誤江南通志名宦傳亦從之而且注曰見舊史攷舊唐書路嗣恭傳并無應但云子恕新書實據此碑增之所謂事增於前

也 趙紹祖識

又按新書路嗣恭傳應貞元初出爲虔州刺史
詔嗣父封而後改刺廬州則在德宗朝代宗時
應尚未官於外也名勝志廬州府志江南通志
皆是臆說其疑誤後人者不淺 趙紹祖又識

唐重建巢湖神廟碑 元和七年 在巢縣 佚

唐重建巢湖神廟碑在巢縣元和七年立其畧云
昔姚萇有不臣之迹堅怒詔白將軍虎斬萇虎戰
敗力窮沉於濡水而堅亦敗績爲萇所殺 輿地紀勝碑目

按此疑有錯誤碑畧所紀苻堅姚萇事似非巢

湖神廟碑中語余所得輿地碑目乃從友人處
鈔本復鈔恐有二碑鈔者遺其一而誤移彼碑
注以繫於此下耳 趙紹祖識

唐同食館記

大和三年
文載廬州府志

陳鴻撰

在合肥

佚

記畧云合肥郡城南門東上曰同食館梁柱朽蠹
賓不可宿太守陽平路君刺郡之明年陶瓦伐木
磨舊礎築新墉廼豐賓堂廼戟前軒開元中江淮
間人走嶠函合肥壽春爲中路大歷末蔡人爲賊
是道中廢元和中蔡州平二京路復出於廬西江
自白沙瓜步至於大梁斗門堰埭鹽鐵緡錢諸侯

權利駢指於河故衣冠商旅率皆由蔡會洛道路
不蒞賓至如歸亦諸侯之事路君爲合肥郡太守
風俗丕變吏不敢欺先是郡米數萬石輸揚州軸
牘相繼出巢湖入大江風波沉溺者半迺於湖東
北岸橐皋里作厓廩三十九間州東兩邑米輸於
此由中港出新婦江至白沙入不勞水無害昔左
邱明傳經因事書事鴻因蔡州道及諸侯之稅因
同食館及路君之政亦春秋之旨大和三年太歲
己酉正月壬午朔二十日辛丑記

按此是追頌路君之功應築同食館及一切廬

州之政皆在德宗朝元和六年卒不得見蔡州之平也

趙紹祖識

唐旌表萬敬儒孝行碑

大中十三年合肥佚

盧潘撰在

萬孝子碑大中十三年知州盧潘立今在孝義坊輿地紀勝碑目

按新書孝友傳萬敬儒五世同居親喪廬墓斷二指寫經更生改其鄉曰成孝鄉聚曰廣孝聚則坊爲孝義坊當亦當時所立而史未之載也

趙紹祖識

唐廬江四辨

大中間載廬州府志

盧潘撰

在合肥

佚文

唐盧潘廬江四辨謂左傳中廬在襄陽之宜城不當以廬爲中廬振廩同食亦在楚莊王新都之處不當命廬江之館曰同食館又謂爾雅歸異出同曰肥不應指夏水與肥水合羣帥囚於冶父乃在荆襄亦不應在廬江

輿地紀勝碑目

辨畧曰應劭曰廬江古廬子國也考尋載籍古無廬國名是劭以廬江爲廬戎之地按左氏傳廬戎亦曰廬在宜城西山中劭誤以中廬之廬爲廬江之廬後人因而不悟

右辨廬江

同食館不知名於何時

咸謂自廬以往振廩同食因以爲名按左傳自廬

以往注云廬今襄陽中廬縣又按漢書地里志當

陽之中廬在襄陽縣南此非廬江明矣因更是館

名曰建德

右辨同
食館

應劭夏水出父城東南至此與

肥合故曰合肥今按肥水出鷄鳴山北流二十里

許分而爲二一東南經合肥入巢湖一西北出壽

春入淮爾雅歸異出同曰肥今二州皆不見夏水

烏覩其夏與肥合者乎

右辨
合肥

冶父山在廬江東北

圖記謂羣帥囚於冶父卽茲山按杜注及地理志

荊州記皆曰冶父城在荊州荒谷西北囚於城豈

囚於山乎按今冶父山實有鐵冶乃作教告縣更

名冶山 右辨冶父山

按四辨大意已具於輿地碑目中余更節取其

語之尤明者錄之 趙紹祖識

唐李翱奏田稅表 寶歷元年 在合肥 佚 文載李習之集

集古錄云不著書撰人名氏碑以寶歷元年立 輿地

紀勝碑目

表畧云建中元年初定兩稅當時絹一匹為錢四千米一斗為錢二百稅戶輸十千者絹二匹半足矣今稅額如故而粟帛賤錢價重絹一匹不過八百米一斗不過五十輸十千者為絹十二匹况督

其錢使之賤賣耶錢者官鑄粟帛者農出今乃使
農賤賣粟帛易錢入官豈非顛倒而取其無者耶
今若詔天下不督錢皆納布帛行之三五年臣知
農人必漸有蓄積故臣曰改稅法不督錢而納布
帛則百姓足

按此李習之論事所上六者之一本通論天下
不知何以立於合肥又獨立此一條在當時必
有說而今不可知矣

趙紹祖識

唐霍公修齋記

無年月

在合肥

佚

集古錄云不著書人名氏其碑文但稱滑毫節度

使霍公而不著名題名附在廬州

輿地紀勝碑目

唐浮槎寺八紀詩

無年月

僧皎撰

在合肥

佚

右浮槎寺八紀詩者自云雁門釋僧皎字廣明作詩雖非工而所載事蹟皆圖經所無可以資博覽浮槎山在今廬州慎縣其山有泉其味與無錫惠泉山水相上下而鴻漸茶經及張又新水記皆不載嘉祐中李留後端愿守廬州以其水遺余因爲之記其事余甚愛山泉而浮槎水特佳頗怪前世遺而不錄及得僧皎紀浮槎八事亦無之乃知物之顯晦有時也治平元年七月三十日書

集古錄

唐廬州重建巢湖太姥廟記

龍紀元年

在巢縣

刑湛夷撰

在巢湖廟中

輿地紀勝碑目

刑湛夷撰八分書并篆額龍紀元年立

廬州府志

唐寶稱大師碑

陳去疾書

天下金石志

後唐張崇修廬州羅城碑

無年月

在合肥

佚

記有云禹貢別九州之域揚鼎居先淮安控七郡之雄廬邦最大真四塞山河之境乃一方禮樂之

邦地勢壯而金斗高人心剛而土風勁

廬州府志

南唐重建明教院記

昇元四年

黃德麟撰

在合

安徽金石畧

卷六

十

黃德麟撰行書昇元四年十月立寶刻類編云在廬州廬州府志

南唐浮槎寺題名記無年月在合肥佚

無書撰人姓名寶刻類編云在廬州廬州府志

南唐重修巢湖太姥廟記保大二年在巢縣佚

保大二年立今在巢湖廟中輿地紀勝碑目

按廬州府志引輿地紀勝碑目上加德勝軍節度使都督廬州諸軍事廬州刺史周鄴立字攷陸游南唐書及吳任臣十國春秋皆言鄴以昇元六年卒而碑立於保大二年則在鄴卒後必

非鄴所立也

趙紹祖識

南唐巢湖南泰院功德碑

保大八年佚

在無爲州

徐吉撰保大八年九月一日建在無爲

寶刻類編

宋廬江縣重建縣治記

建隆二年佚

祝况撰在廬江文載廬州府志

廬江縣署舊在三思橋北卽今儒學基宋建隆二

年大理評事守廬江令謝惟士拓重明館地重建

祝况有記

廬州府志

記畧云周世祖以江表方定郡縣賴才時陳留謝

公入丁斯選下車一載庭事不煩遂因農隙爰徙

公衙時宋建隆二年春三月記

按記於周宋改革不置一辭直如無辭者而記
末自譽其文云屬辭無愧亦可笑矣廬江縣志
云謝惟士於建隆元年蒞任然記明言周世祖
以江表方定郡縣賴才謝公入丁斯選則周顯
德六年任也

趙紹祖識

宋鎮淮樓銅鐘款字

大中祥符八年

在合肥

存

歙陽文正書大中祥符八年正月昌再興鑄在合

肥鎮淮樓上

廬州府志

宋馬忠肅公墓誌銘

無年月

晏殊撰

在合肥

在合肥縣縣西七里宋學士晏殊銘今廢御史楊

瞻立石表之 廬州府志

宋衣錦亭記 天禧間 張君房撰 在合肥 佚

天禧間張君房作以馬亮兩守鄉國故名又有衣

錦坊 輿地紀勝碑目

宋危侍郎墓碣 無年月 在合肥 佚

嘉靖中庠士張善工人鑿塘忽得墟墓乃危侍郎
者有包孝肅撰碣善亟掩之在合肥城東北四里

許名代無攷 廬州府志

宋包孝肅家訓石刻 無年月 在合肥 佚

後世子孫仕宦有犯賊濫者不得放歸本家亡歿

之後不得葬於大塋之中不從吾志非吾子孫仰

珙刊石豎於堂屋東壁以詔後世

孝肅奏議卷首
所載軼事

右包孝肅公自帥鄉部坐失保任降知池州與同

年手帖一通後有誠子孫石刻末云天禧四年五

月男珙奉命勒石按公以天聖五年登甲科當天

禧時公猶未仕而于數年前垂訓如此當考

益公
題跋

按軼事不載年月而益公又親見此石刻其云

當考者未仕人不便作此等言語以訓子孫也

余恐此年月爲後人所增今新刊廬州府志有

金石一門亦不載此石刻則其亡已久無由得

見而辯之

趙紹祖識

又按天禧當作天僖亦疑益公誤記

紹祖又識

宋舒城縣七門廟記

嘉祐二年

劉攽撰

在舒城

佚文載廬州府志

七門堰在廬江縣南一百一十里劉馥爲揚州刺

史修築斷龍舒水灌田千五百頃

太平寰宇記

記畧云嘉祐二年予爲廬州從事始以事至舒城

觀所謂七門三堰者問其居人共溉田幾何對曰

凡二千餘頃實魏揚州刺史劉馥所造七百有餘

年矣予嘆美其功時包君廓爲縣主簿謂予曰漢

初以龍舒之功封信爲羹頡侯信乃爲民濬畝澮

以廣漑浸至馥時廢而復修耳今我將爲侯廟祀之而以馥配子幸爲我記之頃之包君以書來告曰廟謹畢事予嘉包君之能徇於民使侯信之美不忘而建祀合於先王之法於是書之

宋浮槎山水記

嘉祐三年

歐陽修撰

在合肥

今在福嚴寺內

輿地紀勝碑目

記畧云浮槎山在慎縣南三十五里其上有泉自前世論水者皆弗道嘉祐二年李侯以鎮東軍留後出守廬州因以其水遺余於京師故余爲志其事俾世知斯泉發自李侯始也三年二月二十四

日記

宋福嚴寺碑

元豐七年

在合肥

佚

天下名勝志載碑畧云梁武帝第五女夜夢入一
山爲尼詰朝奏帝乃取名山圖展得此山恍如夢
境天監三年勅創道林寺成遂入山祝髮號總持
大師嬪從悉聽爲尼碑陰有宋元豐七年洛陽景
謨遊刻

廬州府志

宋眞宗御製文宣王贊

崇寧四年見

在無爲州

未

崇寧四年篆書在無爲州

寰宇訪碑錄

碑陰有米芾篆書崇寧四年立在無爲州學宮

廬州

府志

按當是米元章知無爲軍時取真宗御製贊而書而立之也訪碑錄廬州府志皆未詳

趙紹祖識

宋寶藏二字

在無爲州

未見

米芾書在無爲州

天下金石志

宋墨池二字

在無爲州

存

米芾書在無爲州

天下金石志

宋寶晉齋帖

無年月

在無爲州

殘闕

陳繹曾云宋曹之格模刻在諸帖爲最下蓋星鳳之子也宣德九年佐錄囚至無爲州見此碑散亡

不完命諸生拓其存者六七碑字多米芾元章所書凡卷首寶晉齋法帖卷第幾俱篆字末有右曹氏家藏真蹟識以大圖書

格古要論

按今有翻刻全本不及原本遠甚格古要論引陳繹曾語以爲星鳳之子又言多米芾元章所書語皆不的且相矛盾余嘗得宋榻數卷勝星鳳遠甚其中刻右軍快雪時晴帖與馮銓快雪堂刻絲毫不異若翻本與戲鴻堂所摹去之遠矣

趙紹祖識

宋無爲軍章吉老墓表

大觀元年米芾撰并書未見文獻廬州府志

章吉老墓在無爲州西門外花家疇有表

廬州府志

表畧云無爲章氏迪字吉老洞精醫書而得針刺之術以其道救人壽至七十九又授其子濟濟誓救三千人因不復針又以父道授子權濟權起病如神逮得守符親所嘗試會濟請願表墓道遂直書其事大觀元年丙戌朔丙戌日男濟立石

宋巢縣建學記

紹興六年文載廬州府志

焦柳撰

在巢縣佚

記畧云抑以紹興癸丑到官謁廟之初僅有堂殿有告余曰是學始建於前任江公瑄迫於受代餘則委於後人甲寅邑大夫趙公來臨顧瞻興歎而

建學之役于是興焉明年建齋舍又明年

下皆闕

按廬州府志巢縣學宋知縣江琯建趙登善繼之次第振興則趙名登善也而府志職官表中

不知何以無此二人名

趙紹祖識

宋廬州新學記

淳熙元年未見

文載廬州府志

在合肥

記畧云乾道癸巳礪老假守山陽郡歸會兩淮復

分帥上命行淮西事合肥郡到郡謁學敗屋幾椽

退問廢置狀咸曰郡自唐會昌時廟學鼎盛迄紹

興隆興一再壞於戎馬後師以迂濶不益武脩固

弗爲礪老曰晉士薦以禮樂爲戰之蓄楚申叔以

德刑詳義禮信爲戰之器魯僖公服淮夷之詩頌
其能修泮宮非武備乎于是齊量出入持以堅忍
日夜營度淳熙改元鳩材庀工以二月癸亥經始
七月庚子告成又取馬忠肅包孝肅二像祀于翼
室揭云所當學俾君子砥礪愛身小人固本知教
戎馬之迹益將削於吾國矣邦人願紀歲月遂書
以爲新學記

宋無爲軍稽古閣記

淳熙四年
州未見

徐幾撰
文載廬州府志
在無爲

記畧云先是無爲軍學以皇祐二年始建於郡治
之西錦繡池之北崇寧二年頒行舍法乃徙於今

漕臺之東隅又遷西隅政和四年復遷錦繡舊址
殿廡堂序畢脩於堂之後創建稽古閣以嚴宸章
奎畫之奉中值建炎紹興兵火學幸不燬而閣無
存淳熙初薨被命掌教此邦會敷文張公士元領
使計臺視事之始祇謁聖師顧瞻太息迺增闢舊
址爲閣五間庀工於淳熙二年三月落成於五月
又以舊堂卑陋更新五間閣之後又爲屋三間於
是無爲軍學甲於兩淮諸生求文以記書之以示
求者淳熙四年三月記

宋包孝肅馬忠肅二公祠記

淳熙九年
在合肥

韓元吉撰
佚文載

廬州府志

記畧云宋有直臣曰包孝肅公合肥人也鄉人祀公於節婦臺下節婦者公之子婦崔也舊宅燬於兵火而臺表巋然棟宇卑陋民欲新之久矣淳熙八年武節大夫延侯璽安撫淮西始爲宇寓公像於中而肖其夫人張與子及婦於後堂侯則又曰馬忠肅公亦是州之傑也是宜並祀於是卽其傍規地以建忠肅之祠惟二公立廟本末與崔氏之事有傳在史固不待述而侯乃以廬人之意請爲之記淳熙九年十二月

宋無爲軍貢院記

無年月 王蔭揆
供 文載廬州府志 在無爲州

記畧云淳熙十二年余爲尚書吏部侍郎鄉校諸生宋霖等以書來告曰吾邦新作貢院成請紀之值余以憂歸不果因循今九年矣去秋大比試者千餘人院之兩廡又不足以容郡守周侯秘捐帑廩之餘增葺之郡博士錢萬頃申記之請余不得辭

按記云淳熙十二年請記因循九年則記之立當在光宗紹熙四五年之間廬州府志謂碑以淳熙十二年立者誤也

趙紹祖識

宋無爲軍繹志亭記

無年月

鍾文珍撰

在無爲州府志

記畧云文武非二致也後世岐而二之且曰天下無全才鄉射不講而諉之無全才寧不厚誣國朝自淳熙申習射之令濡須舊有射圃有士甲中廢比以邊防宜密復締義甲爲鄉井計使君潼川吳先生建牙之初禮士如渴一日語冷掾鍾文珍曰立義甲而不別士甲非所以重衣冠也爰命與寓公高郵司理張君應新糾倡三邑之士五爲伍十爲甲列籍題名近六百人闢學宮東偏爲亭俾及時閒暇從容游習他日貢諸天子之廷建勲業於

宇宙文武挺特必今日士甲中人也記曰射之爲言繹也繹者各繹己之志也亭曰繹志厥旨淵矣

按記云倡三邑之士五爲伍十爲甲時無爲縣

廬江縣鎮巢縣皆屬無爲軍也趙紹祖識

宋包孝肅公墓記

無年月 林至撰
文載廬州府志

在合肥 佚

墓在合肥縣東十五里自子縉以下皆附葬

廬州府志

記畧云至爲淮西從事之三月始得拜謁包公墓

下嗚呼合肥公之鄉里中更兵火故宅廢爲民居

獨廟祀存焉今去城十五里所謂東村原者公之

墓也去皇考侍郎公墓七里邱封荒頽樵牧莫禁

甚者至蹊其墓田欲奪而有之教授丁授端祖縣
令潘君友文相與鳩工斂材次第修之會部使者
王公補之來攝帥事斥公帑助其役立表署阡往
來者皆知爲孝肅之墓瞿然知敬矣爰序其本末
以爲後來勸

宋廬帥田侯生祠記

嘉定元年

陸游撰
佚文載渭南集

在合肥

記畧云開禧二年八月詔以開封田侯琳爲淮南
西路安撫使兼知廬州侯謂廬州爲淮西根本而
古城又爲州之襟要於是增陴壕又有月城亦得
地勢而卑不可恃且爲築羊馬城且爲重塹城甫

畢敵大入乘城拒守夜遣偏將攻其營殺數千人
敵解而趨和州侯斷橋梁燒賊艦絕饜道和州亦
堅壁敵窮乃遁策勲真拜達州刺史將吏士民相
與築生祠於城中移書於予請紀歲月予以侯之
功光明卓絕如此則祀典之請必有任其事者尚
繼書之以示後世爲忠義之勸云

宋待制楚公祠記

嘉定七年

趙汝談撰

在無爲

楚公祠在無爲州祀宋待制楚建中祠久廢無攷

碑存州學

廬州府志

記畧云郡故祠賢守三曰王公遠陳公瓘米公芾

王公爲吏健於才紹聖中爲郡人興三圩開十二井築北嶺以捍水至今蒙其利陳公坐論蔡京斥謫尋起郡復罷其政猶未洽此土也邦人以其天下士故誇以爲榮而米公則翰墨妙當世余謂三賢者祀之當矣然先是楚公建中嘗守此其治一以清靜不擾去之日猶遺愛而獨缺其祠豈不忽諸汝談承乏此地議追爲公之祠以記其行事而歷訪乃了無一得蓋公不以名遺後而遺老亦無傳者相距三甲子矣翹翹之名察察之行一世之所慕耀而爭趨者皆公之細焉爾嘉定甲戌七月

既望趙汝談記

宋廬州重建學記

嘉定十七年

阮覲撰
文載廬州府志

在合肥

記畧云合肥爲學舊矣中興以來一新於乾道癸巳再新於開禧乙丑旋卽傾圯嘉定壬午十二月今師翟公來顧視興嗟於是會羸虛爲鳩工計幸前帥趙公許公皆嘗捐金於學乃益以戎司之帑一撤而新之經始于癸未六月落成于甲申首夏胡君巖起實司教事從史程督績成爲多工踰半而覲踵至蒙成於前人迺次第其事以志諸石翟公名朝宗字叔海開封人也

宋風鶴亭記

無年月

韓無咎撰

在合肥

佚

韓無咎風鶴亭記淮之南故秦九江郡也至漢孝
文析其郡又爲廬江實今西路也自春秋季年吳
嘗會於橐皋而漢封皆在於六及孫曹分爭則以
合肥屬揚州之治築爲新城晉人扼肥水以敗秦
師周世宗屬兵正陽攻戰于紫金山下遺迹猶存
故今廬州形勝云腹巢湖控渦潁膺濡須扼潛皖
隱然爲用武之郊

宋巢縣詩碣

無年月

在巢縣

佚

巢縣北鄉有宋建大力寺址居人掘得碣云地去

巢城十里分招提名目古今存風摩斷礎皴紋暗
雨剝殘碑點畫分一道澗聲飛石壑兩邊山色鎖
雲根杜鵑花裏啼幽徑往事依稀似訴論天下名勝志
按輿地紀勝碑目亦載此碣或是唐末南唐人
所作非宋建寺時詩也趙紹祖識

宋舒城紹定殘碑

紹定二年

在舒城

未見

舒城鳳皇橋官溝稱玉帶河有碑記湮沒街傍露
頂可數寸許明萬歷中縣尹楚石林出之洗字見
碑誌官溝水路傍鐫小楷則紹定二年林知縣立
八字公曰碑待林而出也于是樹碑覆以亭因爲

詩曰五百年前此後身而今桑海幾揚塵四郊祇
剩山川舊片石誰留姓氏新自信彼蒼應有意再
來此地豈無因璇淵一水環如帶繼我遺功俟後
人

廬州府志

按紹定二年歲次己丑至萬歷十七年己丑歲
數三百而云五百年前語未免過當

趙紹祖識

宋三至堂記

無年月

葉祖洽撰

在合肥

佚

府署後堂北爲三至堂宋陳堯佐三守廬州時建

葉祖洽有記

廬州府志

宋曹明之新城記

無年月

在合肥

佚

記有云龍眠蟠其前紫金跨其北淮右襟喉之地

江北恃爲唇齒

廬州府志

宋合肥郡太守廳壁記

無年月佚

洪邁撰

在合肥

宋鄭集大蜀山龍王廟文

大觀中佚

在合肥

佚

元加封孔子詔書

至大二年存

閻復撰

在合肥

右加封詔書在廬州府學閭復撰文正書按詔下於大德十一年九月次年至大元年始刻石字體篆竄正行及蒙古書不一然多不及此碑之楷法也

廬州府志

元重修無爲州學記

延祐四年爲州佚

李禁卿撰

在無

元重修無為州大成殿記至治元年 王德撰 在無為州 未見

按二記廬州府志皆云文載學校而府志學校

門中實未載是二文趙紹祖識

元都司鐵睦亞中去思碑至治二年 在合肥 存

在合肥城鎮淮樓下缺書撰人名至治二年九月

立廬州府志

元舒城縣重建明倫堂記至順元年 虞集撰 在舒城 未見 文載廬州

府志

記畧云延祐乙卯前令杜思敬始重建廟而講堂

卑陋弗治部使者宋公翼嘗督縣令改作辭以故

逮變理溥化登蒙古進士來長是邑始獨出已見
捐已俸以天歷己巳之歲度材庀工撤而新之規
模宏敞始與廟稱至順元年秋變理君以職事如
京師踵門來求文以記之昔邑之君子有李伯時
讀書龍眠山故有龍眠書院在縣治東飛霞亭之
北國初東禪寺僧併之而書院廢變理君得隙地
於清心池亭之上蓋伯時與蘇黃所共遊者乃闢
地爲屋以復書院之舊變理君之於民也有古人
之風哉

元舒城縣重建龍眠書院記

至順元年
在舒城

揭傒斯撰
未見文

載廬州府志

記畧云舒城長變理溥化治地邑東得李伯時龍眠山莊於東禪寺舒王祠西嘗沒于寺者乃募工度功作書院不踰時而成邑賢者范鳳瑞割田二百畝以供祭養

元立賈文肅公祠碑銘

無年月州佚

吳炳撰在無爲文載無爲州志

其銘曰文肅有祠誰所構兮元祐爲黨省無疚兮何人不沒名則壽兮邦人公思食必祝兮好是正直神汝祐兮繼其時享公宜有後兮

元景賢書院大成殿記

至元四年合肥

揭傒斯撰在文載合肥縣

志

記畧云元統元年廬州之三賢堂賜額景賢書院至元四年同知總管府事拜住以夫子殿卑陋弗稱將改作倡以楮幣千五百緡旣而總管三寶泊寮佐皆助於上郡之好義咸相於下乃白部使者將殿四楹廣三十尺有奇深亦如之基崇四尺殿之崇倍其基之七後建講堂四楹其東室以祀宋樞密副使給事中包孝肅公西室以祀太子少保馬忠肅公敷文閣直學士王定肅公所謂三賢者也是年七月訖工同知泗州事進士余闕僑於是

州以其士民之意來京謁記拜住君恒陽王也先不花之孫武昌王亦輦真之季子昔官澧州亦嘗經理文山書院云

記云拜住君恒陽王也先不花之孫武昌王亦輦真之季子按史也先不花之子亦憐真追封武昌王此可見當時譯音之不同字而非有一定之說也拜住不附傳後而元史別有拜住傳安童之孫元之賢相死於賊非記所云之拜住也然此拜住所至亦足稱良吏而史不著其名記亦可補史之闕也

趙紹祖識

元廬州城隍廟記

至元五年
存 文載青陽山房集

余闕撰

在合肥

記畧云神祠在肥水南浮圖宗嵇始作僧舍祠傍其子可龍益募爲殿堂門廡又得寺後廢軍廨及夏氏所施地構別殿於其上畚揷之事皆身親之如此者凡十有餘年而後克成

元清心亭記

至元五年
府志

在合肥

存

文載廬州

記畧云縣治東城之上古有飛霞亭宋李伯時隱居之所蘇文忠公嘗題詠焉亭下有池曰放生中有亭曰清心宋末兵燹廢者百餘年矣泰定甲子大梁張君士舉爲主簿得放生池殘碑於草莽中

載亭頗詳乃葺而新之而池亭未暇葺歲丙寅冀
寧張侯來尹斯土乃取斷碑補其闕文刻置飛霞
亭上俾來者有所攷焉至元己卯環池築堤庀工
伐木輦石陶甃構亭其上遂復清心之舊請余文
記之刻石以告後來

按廬州府志云缺書換人姓名泰定元年立余
攷記泰定甲子所葺者放生池丙寅所立者補
刻放生池碑而復池中清心之舊作記刻石乃
至元己卯事也廬州府志言之不詳余故錄此
記以俟來者正之

趙紹祖識

元廬州路同知拜住公政績碑銘記

至元六年
合肥存

文在

載廬州府志

在合肥鎮淮樓下缺撰書人名至元六年立

廬州府志

記畧云至元庚辰冬十一月公既受代郡士周庭梓等來曰公蒞任五載政績表表非託文貞石何以慰永久之思按事狀公捐資千五百緡新孝肅包公廟像治館傳修麗譙壺漏監倉庾而去弊檢水旱以恤民汰邏卒去土胥辨誣訟惠利及人多類此公蒙古紇烈氏故湖廣行省丞相恒陽王之孫武昌王之子公之伯氏故江西行省左丞都思

鐵睦公當延祐至治間嘗長是路見於去思碑石
公復接武齊名相門遺澤蓋淵淵乎其未艾也

元廬江縣重建文廟記

至正二年

羅永登撰 文載廬州府志

志

記畧云至正辛巳元顏公蒞政之明日謁廟大懼
慨然以作新爲己責邑人周元傑聞之上白於公
請舉私藏以新廟制公義而許之儒士吳剛中而
下或陶瓦或塗墍或繪飾公捐俸肖夫子像南面
其中而配哲雁列左右廡之從祀者悉繪之始於
至元初元而竣則三年之三月也

按廬江縣志元顏公名綱上海人名宦有傳

趙紹

祖識

元立宋侍郎賈文肅公墓碑

至正間存

在無爲州

賈侍郎墓碑及像在無爲州北門外賈家灣至正

間立 廬州府志

按廬州府志載金明源重修賈公墓道記云墓
在州北郭年代久遠幾莫知爲賈公墓乙未秋
吏目沈君以公事出見荆棘中有古碑其完好
處字畫井然上鐫賈公遺像名人詠跋係公九
世孫孝恭於元至正季所勒距今四百餘載矣

亟謀整理州紳盧君聲聞慨然身任鳩工輦石
重建崇坊因綜其整理顛末鐫諸片石豎於墓
所

元葛徵君墓表

至正六年 余闕撰 在合肥 未
見 文載青陽山房集

表畧云君諱聞孫字景先姓葛氏累世皆隱合肥
巢湖之上君生十九年而孤居家孝友每旦冠衣
詣母東夫人問起居眠食飲嘗以貧出爲頓文學
旣而曰此非養志之道尋不復仕其後宰相薦君
文行可用擢翰林國史院編修復辭不赴至正五
年母夫人以壽終予往弔之君哀經癯然是年冬

余還京師而君遂以死矣君歿於至正五年九月其葬在十二月年六十一明年其友余闕表其墓元建興文書院祀漢文翁記

至正九年
在無爲州

王彬撰
文載

廬州府志

記畧云公廬江舒人也漢景帝時爲蜀郡守仁愛好教化歿後蜀人思之至爲立祠設像至順間同知無爲軍事亭羅帖木兒以公事達諸郡府請祠不果至正間余公廷心爲御史復上其事達諸朝見允立院設官其院曰興文八年僕例署是院長而茲院素無定所京師韓侯可久知是州以興舉

學校爲已任卽工於八年春正月越明年秋七月
續成

按記蓋因請祀文翁而設書院也文頗冗長敘
事殊覺瑣瑣不能詳其前後也 趙紹祖識

元青陽山房記

至正十年程文煥
文載廬州府志

在合肥 未

記畧云青陽山房在廬州東南六十里巢湖之上
因山以爲名合肥余公讀書之處也文客京師謁
公於翰林辱不鄙而屬以記余公名闕字廷心至
順癸丑進士今爲浙東廉訪云至至十年七月

元廬江縣禁鐘題字

至正十年 在廬江 存

右廬江縣禁鐘題字其書廬爲庖今時俚俗簿賬
小說往往用此字此鐘爲縣尹張居敬所鑄達魯
花赤普顏不花以下及進士列名者十餘人而用
俚鄙無稽之字足供一噱然亦可見俗字之有本
也

潛研堂金石文跋尾續

元廬州路鐘

無年月

在合肥

存

在府學陽文正書

廬州府志

元合肥修城記及碑陰

至正十三年

余闕撰
文載青陽山房

集

記畧云至正十一年紅巾起淮南合肥城久圯倉

卒爲木柵以守賊大至賴柵以完後僉憲馬君至顧而曰以柵完民幸也非所以固迺白皇孫宣讓王及其憲使高昌公議修其城自十三年二月朔戒事九月畢君前爲庸田僉事城始蘇今憲淮南又城合肥一人之身而二郡賴之儒者之利不其溥哉君名世德字元臣也里可溫國人由進士第歷官應奉翰林文字樞密都事中書檢校庸田僉事爲今官其敦事與凡供役之人則載之碑陰

安徽金石畧

卷七

涇縣趙紹祖琴士輯

鳳陽府

壽陽紫金山父已彝

廬江李氏所藏父已彝得於壽陽紫金山其蓋得於淮之硤石下縮六寸衡八寸高尺有一寸深六寸五分容一升五合銘二行五字一行爲父已一行爲析子孫按古篆多象形商有子孫彝孫字作兩手拱日之狀此彝孫字與商子孫彝同定非三

代下物

博古圖

安徽金石畧

卷七

淮南故宮戈

新平張氏得戈於壽陽紫金山漢淮南王之故宮
以古弩機之度度之双廣寸半內長四寸胡長六
寸援七寸半胡有銘各六字蟲鳥書黃金文博古圖
已舉爵

李公麟得古爵於壽陽紫金山腹有二字曰已舉
高七寸縮六寸衡二寸有半足高三寸容四合小知錄

漢趙王武臣碑

趙王武碑在宿州 金石畧

按宿州志陳勝塚在州西北邱疇山之西麓名
曰塚頭而不言有碑然當時或有碑不可知若
武臣之塚與碑則不應在宿州疑金石畧誤以
陳勝爲武臣也

趙紹祖識

漢相祠三百有五碑

無年月

在宿州

佚

相山距城九十里在相城鄉其脈自彭城蜿蜒而
來高五里周二十里稱州中巨鎮上有古祠漢碑
三百有五率殘斷不可讀

宿州志

漢戚伯著碑

無年月

在宿州

佚

文載隸釋

右伯著碑在今宿州出於近歲蓋宮部春夫開汴

渠於泥沙中掘得之其文字古怪而磨滅不可讀
其僅可見者渤海君元孫季景長子也其事迹不
可考文辭莫曉而字畫不工徒以其古怪錄之此
誠好古之弊也治平元年七月三十日

集古錄

右其字畫如隸書而甚古怪伯著者莫知爲何人

其時世亦不可考但其額曰周末嗣某氏

某字不可識

襲興

興上闕一字

渤海君元孫伯著之碑而已然則周

亦非伯著之姓也

集古錄目

右戚伯著碑其畧可見者充列王室遇謗於呂委
位捐爵而其額題周末嗣戚氏襲以興渤海君元

孫伯著之碑知其姓氏戚所謂充列王室遇謗於

呂者戚夫人也

金石錄

右本周末嗣鹹氏襲以興渤海君元孫伯著之碑
隸額本之上有一字石損其半嘉祐中宿州浚汴
得之泥沙中碑叙其先云調官沛上安措東山子
孫孝弟蓋戚姬遭呂后之禍其族有官於沛者宅
兆所卜子孫因家焉符離卽沛之封內也襲以興
者謂襲周之後而興此時墓刻始萌芽標題未當
律令其字畫古怪偏傍增減亦有不可辨者世祖
建武三年章帝章和元年威宗建和元年獻帝建

安十二年皆丁亥也碑有大歲丁亥字當是建武

或章和所刻者

碑云而為性焉以性為姓也京是府丞以是為兆也之即之字是即

是字束即中字

泉即京字最即丞字事即事字才

是才字尖即筆字

龜即龜字最即始字躬即邪字

吊即不字面即

實字惟芳字未詳隸釋

漢立孫叔敖廟碑

無年月 在壽州 佚

東漢孫叔敖廟碑在安豐縣東三里孫叔敖廟中

輿地紀勝碑目

晉建相山廟碑銘

太康五年 在宿州 佚

晉太康五年詔諸侯祀界內山川沛國令郭卿建

廟銘曰巍巍相山盤紆穹崇上應房心與天靈冲

興雲降雨稼穡以豐

宿州志

晉元康城磚

元康三年

在壽州

存

鄱陽陳秋麓司馬

名其松

得晉壽春磚以爲硯而使

余銘之余案其文曰元康三年七月廿九日秦秦
蓋工人之姓而闕其名也壽春古用武地當元康
三年晉亂潛兆而尚未形自此至永嘉四年僅十
七年中原多故周馥鎮壽春請遷都晉疑其不臣
而討之而壽春之兵禍始此矣未幾晉南遷而此
爲南北必爭之地兵戈相尋凡二百餘年至於隋
平陳而後已乃不謂此磚之尚得存於今也銘曰

博乎硯乎汝厭鋒鏑苦樂圖書之府經千三百載
而出於土乃逢汝主道光四年

趙紹祖識

宋武帝受禪壇記

永初元年

在壽州

佚

宋武受命壇記陸德八分書在壽州

墨池編

按宋武以元熙元年七月遷壽陽二年四月徵
入輔六月至京師卽以是月丁卯設壇於南郊
受禪則壇自在建康不得在壽陽或壽陽人艷
其事以其記重刻之於其地也金石畧墨池編
皆言在壽州而所載甚畧不得而詳矣宋永初
元年卽晉元熙二年也

趙紹祖識

宋受命壇記碑陰 在壽州 佚

在宋武受命壇 輿地紀勝碑目

齊八公山廟碑 永明十年 在壽州 佚

在壽春縣北四十里八公山廟前有碑乃齊永明
十年立 輿地紀勝碑目

天下名勝志引寰宇記云八公山有淮南王廟圖
安及八士像有齊永明所建碑云安與八公埋金
其下一名金梭堆在州東十里兩後輒見金今寰
宇記無此語 壽州志

按碑目云在縣北四十里壽州志云在州東十

里豈建州時移其地耶何相懸如此也

趙紹祖識

梁八公山廟碑

無年月

裴邃遷

在壽州

佚

按梁書壽陽八公山廟碑刺史蕭遙昌立主簿裴

邃爲文今佚

壽州志

隋劉家關殘碑

無年月

在宿州

佚

劉家關在宿州東二十五里隋堤北煬帝築堤時
正經劉氏先塋劉時有貴顯者屬當事自其塋西
堤南曲里許至塋東復曲而北其形如弓約八九
里因名劉家關其北里餘爲劉氏漢晉故里里南
里東皆其先塋元明時猶有墓碑今漫滅無復存

者 宿州志

唐褚遂良殘碑 無年月 在宿州 未見

在州西南丹城舊縣古廟中碑石作六稜石面有字明初居人以水沃之有貞觀年號與褚遂良字可識筆法宛然如所臨樂毅論 宿州志

唐符離縣睢水石橋碑 無年月 房晉撰 在宿州 佚

右碑在宿州 金石畧

碑文房晉撰 宿州志

唐紫極宮碑 無年月 王維書 在壽州 佚

右碑王維書 天下金石志

唐壽州紫極宮記按考槃餘事王維書今佚壽州志

唐立楚王祭淮壇碑永泰元年 在壽州 佚

在壽春縣北四十里唐永泰元年立輿地紀勝碑目

廢西壽春縣在州西南四十里一名楚考烈王故

城城中**有**楚王祭淮壇壽州志

唐立梅先生碑陳章甫撰 在壽州 佚 文載壽州志作羅隱撰

碑云漢成帝時綱紐頽壞先生以書諫天子者再三夫大政雖去而劬履問健者猶數百位尚不能爲國家出力以斷佞臣頭何南昌故吏憤憤於其下得非南昌遠地尉下寮苟觸天子網罟倖臣牙

止於殛一狂人噬一單族而已彼公卿大臣有生
殺喜怒之任有朋黨蕃衍之大出一言作一事必
與妻子謀苟不便其家雖妾婢亦撓挽相制而况
親戚乎况骨肉乎雖有憂社稷心亦噤而不吐也
嗚呼寵祿所以勸功而位大者不語朝廷事是知
天下有道則正人在上無道則正人在下余讀先
生書未嘗不爲漢公卿恨今南游復過先生里遂
碑之

按壽州志以爲羅隱作云見昭諫集有告余者
曰此刻新修全唐文中乃唐開元間進士陳章

甫所撰余既皆未之見姑兩存其說以俟後之
攷定者又天下金石志載此碑於潁州亦云羅
隱穎書而不言其撰文皆未知孰是

趙紹祖識

唐壽州刺史張鎰頌

大歷十四年

趙巨撰

在壽

唐壽州刺史張鎰去思碑王湍分書大歷中

金石

右碑趙巨撰王湍八分書大歷十四年十二月

金石

錄目

按唐書張鎰曾爲壽州刺史墨池編作張鎰字
之誤也輿地紀勝碑目作張公度去思頌鎰字
公度不誤惟碑目作大歷十年起居舍人趙運

文撰與金石錄目不同或趙巨字運文亦未可

知趙紹祖識

唐智源禪師塔銘

元和九年

在鳳陽縣

佚

元和九年立在鍾離縣西南九十里今爲廣慧寺

輿地紀勝碑目

唐彭晁禹廟記

元和十四年

彭晁撰

在鳳陽府

記大畧云昔禹治水之日會於塗山則此地是也

今禹會鄉因茲而立今有禹家夏家皆是禹之苗

裔元和十四年彭晁記

輿地紀勝碑目

唐杜亭碑

元和中

杜牧撰

在鳳陽府

佚

安徽金石畧

卷七

八

在鍾離縣西七十里遺碑拭視元和中大常寺協
律郎杜牧作今碑尚存

輿地紀勝碑目

唐州碑古篆

無年月

在鳳陽府

佚

世傳以爲李陽冰書按唐地里志州舊名豪元和
三年始益之以水作濠是時陽冰歿久矣或云元
豐中郡人錢叔獻見一石刻云豪州碑文開元寺
碑皆韓熙載書

輿地紀勝碑目

唐四望亭記

太和七年

李紳撰

在鳳陽府

佚

唐四望亭記李紳文并書在濠州

金石畧

四望亭記李紳撰正書太和七年二月

金石錄目

唐壽州刺史廳壁記

無年月

李華撰

在壽州

佚 文載壽州志

記畧云漢文帝封淮南王長子安爲王都壽春卽此州也兩漢揚州刺史治於此墀壇猶在在後魏盧潛爲揚州亦鎮於茲潛有德政時人比之羊祐我朝壽春郡隸揚州某年以兼侍御史揚州司馬獨孤問俗爲壽州刺史有德政理州三年遷御史中丞鎮江夏工部郎中楚州張緯之代爲州牧某部郎中常延安代張典此州僉有政聞故書其事以慰楚人之心

唐紫極宮記

會昌四年

在壽州

未見

王惟貞書會昌四年在壽州 金石畧

唐紫極宮鐘銘 無年月 在壽州 未見

唐紫極宮鐘銘沙門維紀書 天下金石志

唐濠州勸民栽桑勅碑 大中十年 在鳳陽府 佚

余得劉苕修兗州文宣王廟碑見大中時中書門下牒又得此碑見大中時勅乃知平章事非署勅之官今世止見中書門下牒便呼爲勅惟告身之制僅存焉 集古錄

唐勸農勅 大中十一年 在鳳陽府 佚

集古錄云不著書人名氏唐宣宗時濠州刺史侯

固奏言其州以棗爲稅民患伐去之固勸使栽植
請除其稅勅依所請并李官請立石狀同以大中
十一年立石今存

輿地紀勝碑目

唐勸栽棗碑

大中十四年

在定遠

佚

在定遠縣門外唐大中十四年濠州刺史侯固奏
乞令人廣栽棗而官司無收稅

輿地紀勝碑目

按侯固請當在大中十年前而勅下於十年立
石則有十年十一年十四年之不同其實同一
事也

趙紹祖識

唐立春申君碑

無年月

皮日休撰

在壽州

佚

春申君碑皮日休文有云春申君憂君不勝以身
市竒計不曰忠乎荆太子旣歸歇孤在秦不信刑
待禍若自屠以當餒虎不曰烈乎然徙都于壽春
失鄧闕一字之故去方城之險捨江漢之利其爲謀
已下矣猶能以吳爲宮室以魯爲封疆春申之力
哉輿地紀勝碑目

唐萬勝岡新城錄

無年月

沈亞之撰

在壽州

右碑沈亞之撰

輿地紀勝碑目

唐壽州團練廳記

無年月

沈亞之撰

在壽州

右碑沈亞之撰

輿地紀勝碑目

唐張皓禪窟寺碑 無年月 在定遠 佚

在定遠西北三十里太平興國禪院 輿地紀勝碑目

唐應福寺彌勒佛記 咸通四年 存鳳陽府 佚

咸通四年立在城中之乾明寺 輿地紀勝碑目

唐壽州嚴公墓誌 咸通五年 王茲撰 在壽州 佚 文載壽州志

誌畧云公諱密字元之其先天水嚴氏之後居祿

凡五十年齡壽凡六十六討窮塞破戎虜大中七

年壽牧燉煌令狐公別奏公用答勞效則團練押

衙管右一軍 闕等將 闕作坊修造使朝議郎檢校

國子祭酒上柱國咸通四年秋九月疾於春申坊

私第以至終歿一子彥思衙前虞候家世自秦州而歸於壽凡一百廿載明年秋八月中旬窆於壽東二里黃公鄉春申坊耐先塋也

唐潁州開元寺新鐘銘

長興三年
州存

李璟撰

在壽

州治大門爲崇臺譙樓去西數十武爲鐘樓東西相望鐘樓在懸稱一州鉅觀相傳洪武初巨浸稽天是鐘從西北蕩漾而來與驚濤怒浪相出沒一入泗止華林寺一止此語涉誕不可信乃縉紳先生多稱之矣驗歟識唐長興間張節鎮造於潁州之開元寺又傳鑄時屢不成一婦人躍入其中如

古歐冶劍者野史有載之乃考之郡志不具也明彭
汝賢重修壽州鐘樓記

吳廣平程公墓誌銘 無年月 在壽州 佚

正陽鎮學宮正殿西壁下有石方一尺四寸四周
列八卦以日月星辰間之中有文曰大吳故廣平
程公墓銘篆書按吳均齊春秋王儉曰石誌不出
禮典起宋元嘉顏延之爲王琳石誌誌者記也記
其人世系名字爵里行治壽年卒葬日月與其子
孫之大畧勒石加葢埋於墓中以防異時陵谷遷
變也有銘則曰墓誌銘按此則宋以前無墓誌矣

廣平程公當是楊行密時人

壽州志

按此祇是誌銘之蓋其誌銘則別一石今不可見無從得其名字及卒葬年月矣然楊行密奉唐正朔其時必不稱大吳或是楊隆演以後人壽州志引王儉之說以爲宋以前無墓誌不知漢墓誌甚多說亦不的

趙紹祖識

南唐紫極宮石磬銘

徐鍇撰

在壽州

未見

右石磬銘徐鍇撰并小篆書鍇與兄鉉在江南以文翰著名王師南征鍇卒於圍城中鉉隨後主歸朝貴顯以壽終集古錄云宋興違命侯來朝二徐

皆得爲王臣者誤矣

金石錄

南唐宓子賤塚碑

無年月

徐鉉撰

在壽州

佚

宓子賤塚碑徐鉉撰

天下金石志

宓子賤墓在州南六十里鐵佛岡舊有碑云子賤

爲魯使吳死於道因葬焉

壽州志

宋太平興國佛幢

太平興國六年書院存

在懷遠縣真儒

文曰南贍部洲大宋國濠州鍾離縣河東昌福坊

弟子邵延興奉爲亡考建造尊勝幢子一軀今辰

圓滿用資生界設齋慶口時太平興國六年十月

六日建立訖右幢長三尺餘上刻佛像大僅如掌

下刻此文字大半寸行列不齊旁有偈語十八句
俚鄙不可讀字跡亦劣然可証宋時鍾離所治兼

及淮北又知今時縣治左右宋爲昌福坊也

懷遠縣志

宋崇德縣太君段氏墓誌銘

熙寧四年在壽州

佚 肅穆撰 文載壽

州志

誌畧云夫人姓段氏鄭郡人給事中集賢學士
之女衛尉寺丞贈虞部郎中潁川陳公昌謨之夫
人皇祐元年十月三日以疾終享年六十二郎中
蚤世夫人年甫三十一奉姑益謹訓子益嚴長子
瑜之官并州文水主簿請奉安輿夫人曰姑老矣

豈可一日去左右姑曰吾孫少年初官爾當往規
誨免貽悔咎夫人不得自止旣去常發涕思慕不
已遂感疾而逝四子長曰瑜邕州節度推官次曰
珂供脩庫副使潤州沿江水陸都巡檢使次日球
開州開江縣主簿季曰玠蚤卒夫人以次子封崇
德縣太君供脩以熙寧四年九月二十五日啟二
親之藪合葬於壽州壽春縣淝水鄉白田里祔先
塋也

宋壽州學記

元豐三年
文載忠肅集

劉摯撰

在壽州

佚

記畧云今上臨御四年詔有司以經義取士增太

學郡國學官設三舍既十年閔學者之未大成乃慨然更新之自太學始方是時膠西韓君晉鄉守壽州一年矣視州之學嘆其庳隘無以承明詔迺得轉運判官廢廨請於朝遷焉日與通判州事新昌石昌麟之躬自臨視凡爲屋百十一楹又請建官爲之師以其事屬余記之元豐三年十月劉摯記

宋蘇東坡畫竹碑

在宿州 佚

扶疎亭在宿州治北城上宋蘇軾守徐日嘗遺墨竹一本於宿宿守鐫石構亭貯之名曰扶疎元季

燬於兵明宏治間知州曾顯搜殘碑二段嵌置亭壁近乾隆甲辰乙巳間忽失去

宿州志

宋白龜泉石記

無年月

在懷遠縣

佚

東坡集遊塗山荆山詩自注云龜泉在荆山下有石記云唐貞元中隨白龜流出右石已無存此記或是唐刻坡公不指爲唐故附諸宋

懷遠縣志

宋蘇東坡塗山詩石刻

無年月

在懷遠縣存

按石刻今存塗山廟中詩云川鎖支祁水尚渾地埋汪罔骨猶存樵蘇已入黃能廟烏鵲猶朝禹會村歟落蘇軾二字此碑余戚友朱輓臣入

廟所親見而懷遠志未載毓臣名鍾嘉慶己巳

進士官池州府教授

趙紹祖識

宋孫臨書祖無擇詩

無年月

在懷遠縣

佚

下山麓入鯀廟出讀祖無擇所賦歌京江孫臨爲

書碑蓋無擇謫守壽春過此而作也

宋濂荆塗二山記

右碑已無存祖無擇詩亦無可考錄

懷遠縣志

宋封相山崇惠侯勅碑

宣和五年

在宿州

未見

宋元豐八年勅賜顯通廟額宣和五年封崇惠侯

勅碑今在相祠內

宿州志

宋皇甫斌禱雨記石碣

紹興間

在懷遠縣

佚

宋劉仲光有夏皇祖之廟石碣

慶元元年
縣佚

在懷遠

禹廟石碣二一大書有夏皇祖之廟六字下方刻
宋慶元初州守劉仲光自造禱雨詞一亦記禱雨
事皇甫斌紹興庚戌來爲郡命鍾離尉丁大榮作
石未剝泐文尚可讀

宋瀛荆塗二山記

右二碣皆廢無隻字可尋矣按舊縣志云宋慶元
元年給事中許及之題曰有夏皇祖之廟郡守劉
光鐫於石似當時修志者尚及見之然訛州守爲
郡守訛劉仲光爲劉光頗與宋記牴牾

懷遠縣志

按宋記云紹興庚戌今攷紹興無庚戌庚戌乃

建炎四年明年辛亥正月始改元爲紹興元年

宋親見碑不知何以誤也 趙紹祖識

宋濠州雙穗堂記

淳熙元年府未見

王景文撰文載雪山集

在鳳陽

記畧云淳熙元年夏四月得麥于濠梁之郊一本而二岐太守張公以爲麥秀兩岐吾祖漁陽之誦吾何以得之成王作歸禾周公作嘉禾國有祥天子承之其不有謙也在小臣尤宜州人請以名其堂則治其左之偏而名之以雙穗來告曰公爲我書之漁陽在漢爲宛人我于今爲安豐人千二百餘年而是物復出大懼無以紹前人之休然天子

之祥非我力也余曰不忘漁陽尊祖也不自有其
祥尊君也初淮南被完顏亮之師公以諸生糾義
旅護鄉閭故安豐不亡太上皇帝義而官之以郡
叅佐付之主上又以提封俾鎮之以儲閣俾直之
居十有餘年安豐有承平之風又以節俾持之濠
梁而俾典之期年濠梁又成樂國始公爲安豐有
蓮一幹而兩華及爲濠梁又如之其祥不獨此也
按記中不著張公之名鳳陽及壽州志亦皆無
之故稍詳焉以俟知者

趙紹祖識

宋夏貴題名摩崖

開慶元年

在懷遠縣

存

右摩崖刻在卞和洞右石壁上前正書大佛字可
徑丈後刻此文字大四五寸行列疎密不齊每行
長丈二尺後所刻銜名每官爲一行凡二十五行
石旣粗燥又爲苔蘚所食多模糊不可辨惟佛字
雄偉可觀耳按記文當是創建寺宇而記中濟寶
字之上下文皆漫滅不可識不能知其爲寺爲塔
爲幢矣今文昌閣正當其地或者卽向時之寺址
耶

懷遠縣志

元王忠惠公墓碑至正元年

在宿州

佚

公名居仁字潤之官執法至正元年立碑記功今

存尺許漫滅不可讀

宿州志

元望先樓記

無年月

揭傒斯撰

在宿州

佚

劉貞簡故居在相城澤門內後人居符離北鼓山
前其先塋在焉南有望先樓元揭傒斯記

宿州志

元達魯花赤遺愛碑

至元十四年

在宿州

佚

元大黑奴字彬卿高顯人至元丁丑爲達魯花赤
郡有遺愛碑謂睢水泛溢補塞宣洩有功

宿州志

元通奉大夫張公墓碑

無年月

在宿州

佚

公諱晉亨字進卿南宮人以萬戶戍宿州分兵列
營於汴堤南北屯田種藝期年皆獲其利卒於官

墓在臨渙西道竹橋殘碑猶存 在宿州

按張晉亨元史有傳其戍宿州在至元四年後
戍鎮江以至元十三年卒於官非卒於宿也或
是卒於鎮江而還葬於宿州耳 趙紹祖識

元應宜兒赤獵虎記 至元二十六年 在鳳陽府存

右碑記文與書法俱劣至元二十六年鍾離定遠
二縣民所立以頌淮東淮西鷹房屯田打捕總管
府達魯花赤應宜兒赤爲民除害之功後題江淮
等處行尚書省劄付鍾離縣遺碑市巡檢王侃郭
直立石濠州時稱臨濠府屬江淮行省至元二十

八年改江淮行省爲江浙行省別立河南江北行
省畫江爲界凡江北州縣皆改屬焉而臨濠亦降
爲濠州矣碑今在鳳陽縣西南劉府集東嶽廟知
縣宛平孫君維龍以予嗜石刻乃募工搨一本見
寄予攷王象之輿地碑目唐杜亭碑在鍾離縣西
七十里遺碑拭元和中太常寺協律郎杜牧作象
之宋南渡時人稱此碑尚存市名遺碑蓋以此今
小杜碑久亡明初勲臣東勝伯劉謙居此土人因
呼劉府集而遺碑之名縣人無知其故者孫君方
撰鳳陽新志因書所聞以遺之

潛研堂金石文跋
尾續

按杜亭碑遺碑拭下有視字恐是拭視二字連

讀今此跋以遺碑拭爲句疑誤

趙紹祖識

元禹廟香火公據碑及重修廟記

大德間縣存

在懷遠

右碑在塗山禹廟碑長四尺分作兩截刻之上半截爲公據下半截爲重修廟記皆正書公據凡十行行字多寡不等修廟記凡二十六行每行十七字

懷遠縣志

按公據給付本觀住持依舊管紹塗山禹帝廟香火提督修造修廟記則儒學正吳文魁撰文提領林應楸篆蓋書丹凝和守一大師濠州通

判住持元妙觀提督廟事潘宗埜立石公據當

卽是給付此立石之人

趙紹祖識

元安豐路修學宮記

泰定四年未見

馬祖常撰在壽州志

記畧云泰定元年東平岳復經歷安豐路事相路學孔子廟皆不稱思所以大而新之告其長屬罔不樂從割財奏力咸來就功二年總管拜降君上謁廟又發帑入會錢遣學正及生員二人作雅樂於吳中於是安豐路學祠事先聖先師廟位樂器秩有序列矣四年教授官許士淵以狀走京師請記之以文

金石錄卷十

元通真觀碑

無年月

在鳳陽府

未見

觀祀藍采和并刻其像及踏踏歌在臨淮縣中
金石志